

ԱՐՏԱՇԵՍ ՇԱՀՆԱԶԱՐՅԱՆ*

Պատմական գիտությունների թեկնածու, դոցենտ

ՀՀ ԳԱԱ պատմության ինստիտուտ

artashesshahnazaryan.1950@gmail.com

ORCID: 0009-0006-7000-5335

DOI: 10.54503/1829-4073-2023.2.66-79

ԶԱՔԱՐՅԱՆՆԵՐԻ ՄԻՋԱՆՁՆԱՅԻՆ ՈՒ ՄԻՋՃՅՈՒՂԱՅԻՆ ՓՈԽՀԱՐԱՔԵՐՈՒԹՅՈՒՆՆԵՐԻ ՊԱՏՄՈՒԹՅՈՒՆԻՑ (1160–1240-ԱԿԱՆ ԹՎԱԿԱՆՆԵՐ)

Բանալի բառեր՝ Զաքարյաններ, Մեծ Սարգիս, Զաքարե Բ, Իվանե Ա, Ավագ, Շահնշահ Ա, Վահրամ Գագեցի

Ներածություն

XII դ. վերջերից XIV դ. երկրորդ կեսն ընկած ժամանակամիջոցում ոչ միայն հյուսիս-արևելյան Հայաստանի, այլև վրացական թագավորության ռազմաքաղաքական կյանքում աննշան ընդմիջումներով նշանավոր Զաքարյան իշխանատոհմի¹ պատմության հետ կապված տարաբնույթ հարցեր եղել ու մնում են հայ և օտարազգի հետազոտողների ուշադրության կենտրոնում: Այդուհանդերձ, Զաքարյանների պատմության հետ կապված որոշ հարցեր կարոտ են առանձին քննության: Այդպիսիներից է, օրինակ, պատմական առանձին շրջափուլերում Զաքարյանների միջանձնային ու միջնուղային փոխհարաբերությունների հարցը:

Զաքարյանների պատմության այդ կողմին անդրադառնալը հնարավորություն կտա ավելի առարկայական ու ամբողջական պատկերացում կազմելու զարգացած ավատատիրության շրջանի երկրորդ փուլի ամենահոշակավոր հայկական իշխանատոհմի ներքին կյանքի մասին: Ընդ որում, քանզի Զաքարյանները գործում էին ոչ միայն հայկական, այլև վրացական միջավայրում, նրանց հատկապես միջնուղային փոխհարաբերությունները հաճախ

* Հոդվածը ներկայացվել է 16.05.23, գրախոսվել է 24.05.23, ընդունվել է տպագրության 28.08.23:

¹ Այս իշխանատոհմը վրացական աղբյուրներում վկայակոչվում է Մխարգրծելիներ (Երկայնաբազուկներ) անունով:

Զաքարյանների միջանձնային ու միջնուղային փոխհարաբերությունների...

աղերսվում էին հայ-վրացական սերտ ու բազմաբնույթ առնչություններին, որոնց անդրադառնալը ևս կարևոր է:

Զաքարյանների միջանձնային ու միջնուղային փոխհարաբերությունները

Զաքարյանների ճյուղավորման հիմքը դրեց այդ տոհմի մեջ հայտնի առաջին սերունդը ներկայացնող ավագ Սարգսի՝ XII դ. առաջին կեսին գործած «հայ ազգաւ և ուղղափառ հաւատով»² որդի Զաքարե Ա-ն՝ իր Սարգիս (Մեծ Սարգիս) և Վահրամ անունները կրող որդիներով: Նրանցից յուրաքանչյուրն իր հերթին ունեցավ համապատասխանաբար Զաքարե (Զաքարե Բ) ու Իվանե (Իվանե Ա) և Զաքարե (Բլուզ Զաքարե) ու Սարգիս (Սարգիս Ա Թմոզվեցի) անունով որդիներ: Մեծ Սարգսից սկիզբ առան Զաքարյանների ավագ երկու ճյուղերը, իսկ Վահրամից՝ կրտսեր դարձյալ երկու ճյուղերը:

Մեծ Սարգսից ծագած ավագ ճյուղերը նրա թոռների՝ Զաքարե Բ-ի ու Իվանե Ա-ի որդիներ Շահնշահ Ա-ի ու Ավագի անուններով կոչվեցին Շահնշահյաններ (Շահնշահյան տուն) և Ավագյաններ (Ավագյան տուն)³: Վահրամից ծագած ճյուղերից մեկը, որը ներկայացնում էին Բլուզ Զաքարեն⁴ ու իր սերունդները, կոչվեցին Վահրամյաններ կամ էլ իրենց նստավայրի անունից Գագեցիներ⁵: Վահրամի մյուս որդի Սարգիս Ա-ն ու իր սերունդներն էլ իրենց իշխանանիստի անունից անվանվեցին Թմոզվեցիներ: Զաքարյան իշխանատոհմի բոլոր ճյուղերն էլ հիմնեցին իրենց իշխանությունները:

Դատելով թեկուզ պապի անունը կրելուց, Զաքարե Ա-ի որդիներից ավագը 1161 թ. վրաց թագավոր Գեորգի III-ի (1156-1184) կողմից Անիի քաղաքացիական կառավարիչ նշանակված Մեծ Սարգիսն էր⁶: Նա Լոռիում ուներ ոչ մեծ տիրույթներ, և լինելով Օրբելիների ավատատիրական հզոր տոհմի ստորական, մասնակցեց Գեորգի III-ի դեմ 1176 թ. նրանց բարձրացրած ապստամբությանը: Սակայն երբ Օրբելիների պարտությունն ակնհայտ դարձավ,

² Ստեփաննոսի Օրբելեան 1910, 391:

³ Տե՛ս Ստեփաննոսի Օրբելեան 1910, 426:

⁴ Այս Զաքարեն անվանակից հորեղբորորդուց տարիքով կրտսեր լինելու պատճառով ստացել էր Բլուզ (փոքր, կրտսեր) մականունը: Տե՛ս Շահնազարյան 1990, 48–49:

⁵ Ստեփանոս Օրբելյանը Շահնշահյան ու Ավագյան տներից հետո Վահրամյաններին հիշատակում է «գագեցին» ձևով (տե՛ս Ստեփաննոսի Օրբելեան 1910, 426):

⁶ Տե՛ս Վարդանայ վարդապետի 1862, 127:

Շահնագարյան Ա.

նա «Օրբելիների եղբայրն ու սիրելին»⁷ համարվելով հանդերձ «որդու և եղբորորդու»⁸ հետ լքեց նրանց ու անցավ թագավորի կողմը:

Վարդան վարդապետի ու վրաց Թամար թագուհու (1184–1207) առաջին պատմիչի վերոբերյալ վկայություններից հետևում է, որ առնվազն արդեն 1161-ին հոր կամ առաջացած տարիքով կամ էլ հանգուցյալ լինելով պայմանավորված՝ Ջաքարյան իշխանատոհմը գլխավորում էր Մեծ Սարգիսը: Բացի այդ, պարզվում է, որ նախքան 1176 թ. կեսերը նրա կրտսեր եղբայր Վահրամը վախճանվել էր, և ինքն էր խնամակալում վերջինիս որդուն: Չնայած վրաց պատմիչը Մեծ Սարգսի որդու և եղբորորդու անունները չի հիշատակում, անառարկելիորեն նկատի է ունեցել նրա ու Վահրամի ավագ որդիներ Ջաքարե Բ-ին և Բլուզ Ջաքարեին: Մեծ Սարգիսն անվիճելիորեն հոգ էր տանում նաև Բլուզ Ջաքարեի կրտսեր եղբոր՝ Սարգիս Ա Թմոզվեցու մասին:

Օրբելիների ապստամբության ժամանակ Ջաքարյանների ճամբարափոխությունը միանշանակ չընդունվելով հանդերձ⁹ վկայեց վճռական պահին այդ տոհմի ճիշտ կողմնորոշվելու և համախումբ գործելու կարողությունը: Դա իր հերթին դրեց պատմական ասպարեզում առաջին քայլերն անող այդ պատվախնդիր ու ռազմական տաղանդով օժտված իշխանատոհմի աննախընթաց վերելքի ամուր հիմքերը:

Թամար թագուհին 1185-ին Մեծ Սարգսին նշանակեց վրացական թագավորության գլխավոր զորահրամանատար՝ ամիրսպասալար և շնորհեց այդ պաշտոնի հայտանիշ Լոռէն¹⁰: Բացի այդ, նա Ջաքարե Բ-ին «շնորհ արեց», իսկ Իվանե Ա-ին «մտցրեց դարբագիում (պետական խորհրդում – Ա.Շ.) ծառայողների կազմի մեջ»¹¹: Շատ չանցած՝ Ջաքարե Բ-ն ու Բլուզ Ջաքարեն «պաշտոնապես ընդունվել էին պալատում»¹², այսինքն հատուկ աստիճանով ընդունվել էին պետական ծառայության¹³: Ինչպես տեսնում ենք, վրացական թագավորության կառավարման համակարգում Ջաքարյան հորեղբորորդիների պաշտոնական առաջխաղացումը կրում էր շարունակական ու համաժամանակյա բնույթ, ինչը պայմանավորված էր վրաց Բագրատունիներին նրանց տոհմի նվիրվածությամբ և, անշուշտ, Մեծ Սարգսի աջակցությամբ:

⁷ Картлис цховреба 2008, 251.

⁸ Картлис цховреба 2008, 251.

⁹ Տե՛ս Հայերեն ձեռագրերի հիշատակարաններ ԺԳ դար 1984, էջ 71:

¹⁰ Տե՛ս Картлис цховреба 2008, 257:

¹¹ Տե՛ս Картлис цховреба 2008, 257:

¹² Տե՛ս Картлис цховреба 2008, 260:

¹³ Картлис цховреба 2008, 297, ծան. 180:

Զաքարյանների միջանձնային ու միջնուղային փոխհարաբերությունների...

Զաքարյանների միջնուղային ու միջանձնային փոխհարաբերությունների սերտությունը դրսևորվեց նաև 1185–1187 թթ. դեպի թշնամական տարածքներ հայ-վրացական զորքերի արշավանքների ժամանակ: Դրանցից «Դվինի երկիր» արշավանքը Զաքարյանները նախաձեռնեցին չորս հորեղբորորդիներով՝ սեփական ուժերով¹⁴: Ապա նրանք համատեղ մասնակցեցին «Գանձակից ներքև՝ մինչև Բելաքունի, ապա Արաքսից վերև մինչև Մասիս ընկած երկրներ»¹⁵ կատարված ևս մի հաջող արշավանքի:

Մեծ Սարգսի մահվանից հետո (1187 թ.) Զաքարյան իշխանատոհմի ավագ դարձավ Զաքարե Բ-ն: Նրա գլխավորությամբ Զաքարյանների բոլոր ճյուղերի ներկայացուցիչներն իբրև Թամար թագուհու հավատարիմ ստորականներ, համատեղ մասնակցեցին նրա առաջին ամուսին Յուրի Բոգոլյուբսկու (Գեորգի Ռուս) գլխավորած 1190–1191 թթ. ավատատիրական հզոր ապստամբության ճնշմանը: Չնայած այդ ապստամբության փաստական ղեկավար Վարդան Դադիանին Բլուզ Զաքարեի անմիջական գերական էր, նա հետևեց իր հորեղբորորդիներին և Սոմխիթի ավատատերերից միակն էր, որ ոչ միայն չհարեց ապստամբներին, այլև գործուն մասնակցեց նրանց ելույթի ճնշմանը¹⁶: Զաքարյան չորս հորեղբորորդիները հատկապես աչքի ընկան Զավախքում կայացած վճռական ճակատամարտում ապստամբներին ջախջախելիս¹⁷:

Թամար թագուհին ապստամբությունը ճնշելուց հետո իր կողմնակիցներին հատուցելիս ոչ պատահաբար առատաձեռն գտնվեց հատկապես նրանց նկատմամբ: Զաքարե Բ-ը ստացավ Ռուսթավ քաղաքն ու ամիրսպասալարի պաշտոնը, Իվանե Ա-ն՝ Կայան ու Կայծոն բերդերը և մսախուրթ-ովսուցեսությունը՝ արքունի սենեկապետությունը, Բլուզ Զաքարեն՝ Գագ, իսկ նրա եղբայր Սարգիս Ա-ն Թմոզվի բերդը¹⁸: Որոշ ժամանակ անց, Զաքարե Բ-ին հանձնվեց նաև մանդատուրթ-ովսուցեսի՝ արքունի արարողապետի պաշտոնը:

Գեորգի Ռուսի ապստամբության ճնշումից շատ չանցած ռազմական անուրանալի տաղանդով օժտված «արիագոյնք»¹⁹ Զաքարյանները, նորանվաճված տարածքները դրանք գրաված զորավարներին հանձնելու ուղեգիծ որդեգրած վրաց Բագրատունիների հովանավորությամբ ու աջակցությամբ,

¹⁴ Картлис цховреба 2008, 260.

¹⁵ Картлис цховреба 2008, 260.

¹⁶ Картлис цховреба 2008, 265.

¹⁷ Տե՛ս Картлис цховреба 2008, 265:

¹⁸ Картлис цховреба 2008, 266:

¹⁹ Վարդանայ վարդապետի 1862, 138:

Շահնագարյան Ա.

ձեռնամուխ եղան սելջուկյան տիրապետության տակ եղած հայկական տարածքների ազատագրմանը: Որոշ հարկադրական ընդմիջումներով ուղեկցված ազատամարտերը գլխավորապես ընթացան հյուսիս-արևելյան Հայաստանում և շարունակվեցին մինչև 1236 թ. մոնղոլների նվաճողական արշավանքը: Ինչպես նախքան այդ ազատամարտերը, այնպես էլ դրանց ընթացքում Ջաքարյան հորեղբորորդիները մեծ մասամբ համատեղ կատարեցին հետախուզական-ավարառուական բնույթ կրող մի շարք արշավանքներ, ինչը վկայում է նրանց սերտ համագործակցության մասին: Ավելին, այդ ազատամարտերին նրանց մասնակցությունը ոչ միայն անձնական, այլև տոհմական շահերով էր պայմանավորված: Այսպես, Կիրակոս Գանձակեցու վկայությամբ, սելջուկյան տիրապետության տակ գտնվող հայկական գավառների ազատագրման միջոցով իր իշխանության ընդարձակման գործում Բլուզ Ջաքարեին մեծապես օգնում էր նրա եղբայր Սարգիս Ա Թմոզվեցին²⁰: Նույն պատմիչի համաձայն, նրանց իրենց հերթին աջակցում էին «մեծ իշխանք», այսինքն Ջաքարե Բ-ն և Իվանե Ա-ն և «ձեռնատուութեամբ նոցին առին և նոքա բազում գաւառս ի պարսից»²¹: Ընդ որում, Իվանե Ա-ն 1190-ական թթ. երկրորդ կեսին Նոր Բերդը համանուն իշխանությամբ ազատագրելով²² հանձնել էր Բլուզ Ջաքարեին: Ավելին, նա հետագայում՝ 1216/1219 թ., Բլուզ Ջաքարեի որդի Վահրամ Գագեցուն օգնեց ազատագրել և իր իշխանությանը միացնել Շամքոր քաղաքը²³:

Շատ ջերմ ու սերտ էին նաև միշտ համերաշխ Ջաքարե Բ-ի և Իվանե Ա-ի փոխհարաբերությունները: Պատահական չէ, որ ժամանակակիցները նրանց հաճախ հիշատակում էին ոչ թե սոսկ իբրև եղբայրներ, այլ հարազատներ կամ հարազատ եղբայրներ²⁴: Ջաքարյան եղբայրների համախոհությունը խախտվեց միայն մեկ անգամ, երբ Ջաքարե Բ-ի կողմից «բարեպաշտ հարազատ»²⁵, այսինքն հայ առաքելական եկեղեցու հավատարիմ հետևորդ բնութագրված Իվանե Ա-ն «խոտորեցաւ յաղանդն Քաղկեդոնի, յոր կործանեալ էին վիրք... իսկ Ջաքարէ յուղղափառութեանն եկաց, զոր դաւանեն հայք»²⁶:

²⁰ Տե՛ս Կիրակոս Գանձակեցի 1961, 163:

²¹ Կիրակոս Գանձակեցի 1961, 163:

²² Տե՛ս Մուրադյան 1977, 119:

²³ Տե՛ս Վարդանայ վարդապետի 1862, 140:

²⁴ Տե՛ս, օրինակ, Դիվան հայ վիմագրության 2012, 114, 165, Վիմական տարեգիր 1913, 59:

²⁵ Դիվան հայ վիմագրության 1966, 58:

²⁶ Կիրակոս Գանձակեցի 1961, 166:

Զաքարյանների միջանձնային ու միջնուղային փոխհարաբերությունների...

Ընդ որում, Իվանե Ա-ն այդ քայլին դիմեց եղբոր կարծիքն անտեսելով²⁷: Սակայն անգամ այդ հանգամանքը չխաթարեց նրանց փոխհարաբերությունները:

Վստահաբար պնդելի է, որ Զաքարե Բ-ն մինչև մահը (1212 թ.) իր ավագությունը չէր չարաշահում ու եղբորը շատ ջերմ էր վերաբերվում: Այսպես, երբ Իվանե Ա-ն 1211-ին հայ-վրացական զորքերի կողմից Խլաթի պաշարման ժամանակ անզգուշաբար գերվեց, Զաքարե Բ-ն նրան ազատելու համար կատարեց այդ քաղաքի տեր ալ-Մալիք ալ-Ահուադի դրած բոլոր պայմանները, որոնք շատ ծանր էին²⁸:

Սակայն երբ հարկ էր լինում, նա չէր վարանում տեղին կշտամբելու իր մեղանշած ազգականին: Այսպես, երբ 1211 թ. աշնանը – 1212 թ. սկզբին Զաքարյանների Ատրպատական ու Խորասան կատարած արշավանքի ժամանակ Սարգիս Ա Թմոզվեցու որդի Թադիադինը Զաքարե Բ-ի հրամանը խախտելով՝ առանց նրան իրազեկ պահելու հարձակվեց հակառակորդի վրա, նա չնայած հաղթանակ տանելուն, արժանացավ Զաքարե Ա-ի խիստ հանդիմանությամբ²⁹:

Կարելի էր կարծել, որ հետագայում Զաքարյանների տարբեր ճյուղերի ներկայացուցիչների փոխհարաբերություններին բնորոշ սերտությունը կպահպանվի: Սակայն կատարվեց հակառակը: Զաքարե Բ-ից հետո «մնաց որդի Զաքարեի՝ մանուկ տիօք Շահնշահ անուն նորա, զոր սնոյց Իվանէ ընդ որդոյ իւրում Սարգսի, զոր Աագն կոչէին, մինչև եհաս յարբունս հասակի և տիրեաց հայրենի իշխանութեանն»³⁰: Իրականում «յարբունս հասակի» հասած Շահնշահ Ա-ն լիովին «հայրենի իշխանութեանը» չտիրացավ:

Ճիշտ է, Շահնշահ Ա-ն հայրական բոլոր տիրույթները ժառանգեց³¹, սակայն նրան տրվեց հոր արքունի պաշտոններից միայն մանդատուրթ-ովսուցեսությունը, իսկ կարևորությամբ դրան գերազանցող ամիրսպասալարությունը՝ ոչ: Դրան խանգարեց եղբոր մահվանից հետո Զաքարյան իշխանատոհմի ավագությունը ստանձնած Իվանե Ա-ն: Օգտվելով 1197 թ. ծնված³² Շահնշահ Ա-ի անօգնականությունից, կնոջ՝ Խոշաքի հետ նրա խնամակալը լինելուց և

²⁷ Տե՛ս Կարտլիս ցხოვრება 2008, 281:

²⁸ Մանրամասն տե՛ս **Շահնազարյան** 2005, 40–41:

²⁹ Տե՛ս Կարտլիս ցხოვრება 2008, 288:

³⁰ **Կիրակոս Գանձակեցի** 1961, 186–187:

³¹ Տե՛ս Կարտլիս ցხოვრება 2008, 338:

³² Տե՛ս **Մուրադյան** 1977, 104, ծան. 29:

Շահնագարյան Ա.

ամենաուշը 1212-ից իբրև վրացական թագավորության աթաբեկ (թագաժառանգի խնամակալ) արքունիքում ունեցած գերազդեցիկ դիրքից, նա տիրացավ նաև ամիրսպասալարության պաշտոնին: Եվ դա այն դեպքում, երբ այդ պաշտոնի նկատմամբ Շահնշահ Ա-ի ժառանգորդական իրավունքները շեշտվում էին դեռ 1206 թ., երբ նա հոր հետ միասին հիշատակվում էր իբրև ամիրսպասալար. «յամիրսպասալարութեանն Զաքարէի եւ որդւոյ իւրոյ Շահնշահի»³³:

Իվանե Ա-ի այս քայլը հարուցեց ոչ միայն Շահնշահ Ա-ի անթաքույց դժգոհությունը, այլև ժամանակակիցների կողմից հասկանալիորեն միանշանակ չընդունվեց³⁴: Ամիրսպասալարության պաշտոնը չժառանգելու պատճառով հորեղբորից դժգոհ լինելու վառ վկայություն է Արթիկի Ս. Գևորգ եկեղեցում 1222-ին Շահնշահ Ա-ի թողած ուշագրավ արձանագրությունը³⁵: Դրանում նա իր զավակներին ու հորեղբորորդի Ավագին իբրև եղբոր՝ «եղբայրն իմոյ Ավագին»³⁶ հիշատակելով հանդերձ, ոչ պատահաբար հորեղբորն անտեսել է: Այդ արձանագրության շահեկան քննությունը կատարած Հ. Մարգարյանն իրավացիորեն նկատել է, որ «այս իրողութեան պատճառները պետք է փնտրել ներընտանեկան փոխյարաբերությունների ոլորտում»³⁷, հավելելով, որ այդ կերպ «Զաքարէի որդին հայրական դիրքը վերստին յիշեցնելու խնդիրն է լուծել»³⁸: Պետք է նաև կարծել, որ Շահնշահ Ա-ն Ավագին իբրև եղբայր հիշատակելով նկատի է ունեցել վերջինիս հետ միասին նրա մոր կողմից սնուցված լինելը:

Իվանե Ա-ն ամիրսպասալարության պաշտոնը յուրացնելով հիմք պատրաստեց, որ այն փոխանցվի ոչ թե զորավարական մեծ տաղանդով օժտված եղբորորդուն, այլ, եթե հավատանք Սամվել Անեցու շարունակողին, 1206 թ. ծնված³⁹, այսինքն Շահնշահ Ա-ից 9 տարով փոքր «պատերազմասէր»⁴⁰, բայց ռազմական ձիրքով նրան զիջող Ավագին: Դա տեղի ունեցավ 1227-ին՝ Ռուսուդան թագուհու (1223–1245) օրոք, երբ ըստ Սամվել Անեցու շարունակողի՝ Ավագն ընդամենը 21 տարեկան էր:

³³ Դիվան հայ վիմագրության 2012, 319:

³⁴ Տե՛ս օրինակ Դիվան հայ վիմագրության 1966, 2, 4, 17:

³⁵ Տե՛ս Դիվան հայ վիմագրության 2017, 66:

³⁶ Դիվան հայ վիմագրության 2017, 66:

³⁷ Մարգարեան 2019, 84:

³⁸ Մարգարեան 2019, 85:

³⁹ Տե՛ս Սամուէլ Անեցի և շարունակողներ 2014, 216:

⁴⁰ Վարդանայ վարդապետի 1862, 148:

Ձաքարյանների միջանձնային ու միջնուղային փոխհարաբերությունների...

Այդուհանդերձ, ինչպես հետևում է Օձուն գյուղի 1228 թվակիր մի արձանագրությունից, Շահնշահ Ա-ն, որն Ավագի ամիրսպասալար դառնալուց հետո էլ շարունակում էր այդ պաշտոնը կրող համարվել⁴¹, ստիպված էր բավարարվել մանդատուրթ-ովսուցեսության պաշտոնով: Սակայն Շահնշահյաններն ամիրսպասալարությունը կորցնելու մտքի հետ չէին հաշտվել և այդ պաշտոնը մնում էր նրանց ու Ավագյանների միջնուղային եթե ոչ պայքարի, ապա «վիճարկումների առարկայ»⁴²: Ի դեպ, Շահնշահ Ա-ի զորքի օգնությամբ իր իշխանության տարածքը զգալիորեն ընդարձակած Իվանե Ա-ն նրան որևէ կերպ չհատուցեց: Այս իրողությունը ևս եղբորորդու նկատմամբ նրա իրական վերաբերմունքի ցուցիչ է:

Ինչ վերաբերում է Իվանե Ա-ի մսախուրթ-ովսուցեսության պաշտոնին, ապա այն, անկասկած ոչ առանց նրա միջամտության, տրվել էր Վահրամ Գագեցուն: Սա պետք է բացատրել ի դեմս եղբորորդու՝ Շահնշահյանների հետ փոխհարաբերությունների սրման պայմաններում Վահրամյանների հետ Ավագյանների կապերն ավելի ամրապնդելու և արքունի այդ կարևոր պաշտոնն իր տոհմի ձեռքում պահելու Իվանե Ա-ի ցանկությամբ:

Իվանե Ա-ի ու Վահրամ Գագեցու համախոհությունը դրսևորվեց նաև այն ժամանակ, երբ նրանք վրացական թագավորության այլ մեծատոհմիկներից առավել խիստ դժգոհելով վրաց թագավոր Գեորգի Լաշայի (1207–1223)՝ թագակրին անվայել վարքից, նրան ստիպեցին մեղանչելով «երդվել հետագայում ոչինչ չանել առանց իրենց խորհրդի»⁴³: Վահրամ Գագեցու և Շահնշահ Ա-ի նկատմամբ Իվանե Ա-ի վերաբերմունքի տարբերության մասին վկայում է նաև այն փաստը, որ Նորավանքի Սուրբ Նշանի պատկանելիության շուրջ ծագած վեճը հարթելու համար Դվինում 1216 թ. վերջինիս հրավիրած դատական աստիճանի մասնակիցների թվում Վահրամ Գագեցին հիշատակվում է, իսկ Շահնշահ Ա-ն՝ ոչ⁴⁴, ինչը վերջինիս անչափահասությամբ չի կարելի բացատրել:

Այդուհանդերձ, Իվանե Ա-ի ու Վահրամ Գագեցու փոխհարաբերությունները միշտ չէ, որ անամպ էին, ինչի վկայությունն է 1225 թ. կայացած Գառնիի ճակատամարտին վերջինիս չմասնակցելը: Թվում է, թե դրա պատճառը հայտնել է Կիրակոս Գանձակեցին: Ըստ նրա, Ռուսուդան թագուհին ու Իվա-

⁴¹ Տե՛ս Դիվան հայ վիմագրության 2012, 296:

⁴² Մարգարեան 2019, 89:

⁴³ Картлис цховреба 2008, 265.

⁴⁴ Տե՛ս Ստեփաննոսի Օրբելեան 1910, 355:

Շահնագարյան Ա.

նե Ա-ն այդ ճակատամարտից առաջ «դաշինս եղեալ էին, եթէ յաղթեսցեն... զամենայն հայ մարդ ի կրօնս վրաց դարձուցեն, որք ընդ իշխանութեամբ նոցա և զընդդիմացեալսն՝ սրով բարձցեն»⁴⁵, ինչին Վահրամ Գագեցին, ի թիվս այլ հայ իշխանների, անկասկած, դեմ լինելով, ճակատամարտին չի մասնակցել:

Ռուսուդանի գահակալելուց հետո ևս Ջաքարյանները համերաշխ շարունակեցին մնալ վրաց Բագրատունիների հենարանը և նա «վարէր զիշխանութիւն թագաւորութեանն ի ձեռն զօրագլխացն Իւանէի, և որդւոյ իւրոյ Ավագին և Շահնշահի՝ որդւոյ Ջաքարէի և Վահրամայ և այլոցն»⁴⁶: Սակայն, երբ Ռուսուդանը, Գեորգի Լաշայի կտակը խախտելով և եղբորը տված խոստումը դրժելով, նրա որդի Դավթին (Ուլու Դավիթ) կյանքից զրկելու նպատակով՝ աքսորեց Կեսարիա և Քուֆախում թագադրեց իր որդի Դավթին (Դավիթ Նարին), Ջաքարյաններից և ոչ մեկն ի թիվս այլ իշխանների՝ այդ արարողությանը ներկա չէր⁴⁷:

Այս մասին հայտնող XIV դարի վրաց Անանուն ժամանակագիրը ոչ պատահաբար հարկ է համարել հավելել, որ այդ իշխաններից «յուրաքանչյուրը հնազանդ էր Ռուսուդան թագուհուն, բայց նրանց հարմար չէր ներկա գտնվել Դավթի թագադրմանը»⁴⁸: Սակայն իրականում այդ իշխանների բացակայության պատճառն անհարմարությունը չէր: Պարզապես նրանք ևս, շատերի նման Ռուսուդանին սոսկ «աթոռակալ» դիտելով⁴⁹, վրաց գահի օրինական ժառանգորդ էին համարում ոչ թե նրա, այլ՝ Գեորգի Լաշայի, ճիշտ է անօրինական, որդուն: Ի դեպ, չնայած վրաց ժամանակագիրը թագադրությանը չմասնակցած Ջաքարյաններից հանվանե հիշատակում է առաջացած տարիքի հետևանքով ասպարեզից փաստորեն հեռացած Իվանե Ա-ի փոխարեն այդ տոհմը գլխավորող Ավագի, Շահնշահ Ա-ի ու Վահրամ Գագեցու անունները միայն, իրադարձությունների հետագա ընթացքից երևում է, որ նրանց հետևել են նաև Թմոզվեցիները: Այսինքն, Ջաքարյանների բոլոր ճյուղերի ներկայացուցիչներն էլ Ռուսուդանի որդու գահակալմանը դեմ են եղել:

Սակայն հետագայում այդ հարցում նրանց միակարծությունն Ավագի դիրքորոշման փոփոխության պատճառով խախտվեց: Բանն այն է, որ մինչ-

⁴⁵ Կիրակոս Գանձակեցի 1961, 224: Հմմտ. Միխայէլի Ասորոյ 1871, 519–520:

⁴⁶ Կիրակոս Գանձակեցի 1961, 238:

⁴⁷ Տե՛ս Կարտլիս ցხოვრება 2008, 343:

⁴⁸ Կարտլիս ցხოვრება 2008, 343.

⁴⁹ Մանրամասն տե՛ս Մուրադյան 1977, 155:

Զաքարյանների միջանձնային ու միջնուղային փոխհարաբերությունների...

դեռ Դավիթ Նարինը 1244 թ. կեսերից մոր գահակցի իրավունքներում հաստատվելու համար գտնվում էր Բաթու խանի մոտ, Ռուսուդան թագուհին 1245 թ. առաջին կեսին⁵⁰ «վճարեցաւ ի կեանս. և գրեաց գիր կտակի առ իշխանն Ավագ և յանձնեաց ի նա զորդին իւր, եթէ դարձցի ի ղանէն»⁵¹: Ընդ որում, դեռ 1243 թ. Բաթուի մոտ էր ուղարկվել նաև Ռուսուդանի կողմից աթաբեկ նշանակված Ավագը, որն այնուհետև տարվել էր Ղարաղորում:

Այս պայմաններում, հատկապես Զաքարյանների մնացած երեք ճյուղերի ներկայացուցիչների ջանքերով և Վահրամ Գագեցու ու Սարգիս Բ Թմոզվեցու անմիջական մասնակցությամբ, Ուլու Դավիթը Կեսարիայից բերվեց հայրենիք ու թագադրվելով կոչվեց «Վահրամուլ թագավոր, այսինքն թէ Վահրամ եղիր թագավոր»⁵²: Մոնղոլներն Ուլու Դավթին ևս Սարգիս Բ Թմոզվեցու ուղեկցությամբ ուղարկեցին նախքան այդ Դավիթ Նարինին Ղարաղորում ճանապարհած Բաթու խանի մոտ: Ղարաղորումում Դավիթ Նարինը մնում էր Ավագի հետ⁵³, ինչը փաստում է նրանց հարաբերությունների սերտությունը: Շատ չանցած Բաթուն Ուլու Դավթին ևս Սարգիս Բ Թմոզվեցու հետ ուղարկեց Ղարաղորում, որտեղ նա բանավիճում էր Դավիթ Նարինի կողմնակիցների հետ⁵⁴:

Ի վերջո, մեծ խան Գոյուքը (1246–1248) երկու Դավիթներին էլ թագավոր հաստատեց՝ Ուլու Դավթի ավագությամբ⁵⁵: Երբ նրանք 1248 թ. վերադարձան Վրաստան՝ «գանձս թագաւորութեան ... բաժանեալ ... միջնորդութեամբ Աւագին»⁵⁶, որը 1247 թ. կեսերից գտնվում էր Վրաստանում: Որ ի հակադրություն իր տոհմակիցների, մասնավորապես Շահնշահ Ա-ի, Ավագը Դավիթ Նարինի գահակալության հարցում իր սկզբնական դիրքորոշումը փոխել էր, վկայում է վրաց Անանուն ժամանակագիրը: Ըստ նրա, երբ երկու Դավիթներն «ամուր թագավոր նստեցին... այդ պատճառով Շանշեի (Շահնշահ Ա-ի – Ա. Շ.) սերը կասկածելի դարձավ Լաշայի որդի Դավթի հանդեպ, իսկ Ավագի նվիրվածությունը՝ Ռուսուդանի որդի Դավթի նկատմամբ»⁵⁷: Դավիթ Նարինի գահա-

⁵⁰ Տե՛ս Հայոց պատմություն, հ. II, գ. երկրորդ 2014, 287–288:

⁵¹ Տե՛ս Կիրակոս Գանձակեցի 1961, 316:

⁵² Գրիգոր Ակներցի 1974, 34: Կիրակոս Գանձակեցին սխալմամբ այս արարողության մասնակից է համարել նաև Ավագին (տե՛ս Կիրակոս Գանձակեցի 1961, 289:

⁵³ Տե՛ս Картлис цховреба 2008, 353:

⁵⁴ Տե՛ս Картлис цховреба 2008, 359:

⁵⁵ Տե՛ս Կիրակոս Գանձակեցի 1961, 316:

⁵⁶ Կիրակոս Գանձակեցի 1961, 316–317:

⁵⁷ Картлис цховреба 2008, 360.

Շահնագարյան Ա.

կալման հարցում Ավագի դիրքորոշման փոփոխությունը բացատրելի է Ռուսուդան թագուհու կտակով նրա որդու խնամակալությունն իրեն հանձնված լինելով: Վերոգրյալի լույսի ներքո Պոռոշ Խաղբակյանն Ավագին «Վրաց թագադիր»⁵⁸ կոչելիս թերևս նկատի է ունեցել նրա աթաբեկության պաշտոնը: Ինչ վերաբերում է Ավագի՝ Շահնշահյանների ու Ավագյանների փոխհարաբերություններում կռվախնձորի վերածված ամիրսպասալարության պաշտոնին, ապա օրինական արու զավակ չունեցող⁵⁹ Ավագի մահվանից հետո (1250 թ.) այն տրվեց Շահնշահ Ա-ի որդի Զաքարե Գ-ին:

Եզրակացություն

Զաքարյանների միջանձնային ու միջնյուղային փոխհարաբերությունների պատմության ուսումնասիրությունը թույլ է տալիս ավելի առարկայական ու ամբողջական պատկերացում կազմել այդ նշանավոր հայկական իշխանատոհմի ներքին կյանքի մասին: Մեծ Սարգսի ու Զաքարե Բ-ի ավագության ժամանակ Զաքարյանների միջանձնային ու միջնյուղային փոխհարաբերություններին բնորոշ էին համերաշխությունը, միակարծությունն ու փոխօգնությունը: Ընդ որում, այդ առումներով հատկապես սերտ էին Շահնշահյանների ու Ավագյանների և վերջիններիս ու Վահրամյանների, ինչպես նաև Վահրամյանների ու Թմոզվեցիների միջնյուղային փոխհարաբերությունները: Բնականաբար, սերտ էին նաև Զաքարյանների այդ ճյուղերի ներկայացուցիչների միջանձնային փոխհարաբերությունները:

Հատկապես սերտ էին Զաքարե Բ-ի ու Իվանե Ա-ի փոխհարաբերությունները: Սակայն հետագայում Շահնշահյանների ու Ավագյանների փոխհարաբերությունները կորցրին նախկին ջերմությունը, քանի որ Շահնշահ Ա-ն չհաշտվեց հոր ամիրսպասալարության պաշտոնին՝ Իվանե Ա-ի տիրանալու, իսկ հետո իր որդի Ավագին փոխանցելու հետ: Ընդ որում, Իվանե Ա-ի մասխորթ-ովսուցեսության պաշտոնը ոչ առանց նրա միջամտության տրվեց Վահրամ Գագեցուն: Դա նպատակ ուներ Վահրամյանների հետ Ավագյանների կապերն ամրապնդել և այդ արքունի կարևոր պաշտոնը պահել Զաքարյանների ձեռքում: Միջնյուղային փոխհարաբերություններում Զաքարյանների միակարծությունը խախտվեց, երբ վրաց գահի համար Գեորգի Լաշայի ու Ռուսուդանի որդիների պայքարում Ավագն իր սկզբնական դիրքորոշումը փոխելով, ի հակադրություն Զաքարյանների մյուս ճյուղերի ներկայացուցիչների,

⁵⁸ Յովսէփեան Գարեգին 1969, 305:

⁵⁹ Տե՛ս Կիրակոս Գանձակեցի 1961, 321:

Զաքարյանների միջանձնային ու միջնուղային փոխհարաբերությունների...

պաշտպանեց Ռուսուդանի որդի Դավիթ Նարինին: Այսպիսով, քննվող ժամանակամիջոցում Զաքարյանների միջանձնային ու միջնուղային փոխհարաբերությունները ենթարկվեցին էական փոփոխությունների:

ՄԱՏԵՆԱԳԻՏՈՒԹՅՈՒՆ

Գրիգոր Ակնեցի 1974, Պատմություն թաթարաց, Երուսաղեմ, տպարան Սրբոց Յակոբեանց, 80 էջ:

Դիվան հայ վիմագրության 1966, պրակ I, կազմեց Հ.Ա. Օրբելի, Երևան, Հայկական ՍՍՀ ԳԱ հրատ., 138 էջ:

Դիվան հայ վիմագրության 2012, պրակ IX, կազմեցին Ս.Գ. Բարխուդարյան, Կ.Գ. Ղաֆադարյան, Ս.Տ. Սաղումյան, Երևան, ՀՀ ԳԱԱ «Գիտություն» հրատ., 611 էջ:

Դիվան հայ վիմագրության 2017, պրակ X, կազմեց Ա.Գ. Բարխուդարյան, Երևան, ՀՀ ԳԱԱ «Գիտություն» հրատ., 211 էջ:

Կիրակոս Գանձակեցի 1961, Պատմություն Հայոց, Աշխատասիրությամբ Կ. Ա. Մելիք-Օհանջանյանի, Հայկական ՍՍՀ Գիտությունների ակադեմիայի հրատ., Երևան, 426 էջ:

Հայերեն ձեռագրերի հիշատակարաններ ԺԳ դար 1984, կազմեց Ա.Ա. Մաթևոսյան, ՀՍՍՀ ԳԱ հրատ., Երևան, 987 էջ:

Հայոց պատմություն 2014, հ. II, գիրք երկրորդ, Երևան, «Զանգակ» հրատ., 798 էջ:

Մարգարեան Հ. 2019, Դիտարկումներ Արթիկի 1222 թ. վիմագիր արձանագրության վերաբերյալ, Հանդես ամսօրեայ, թիվ 1–12, Վիեննա, էջ 79–100:

Միխայելի Ասորոյ Ժամանակագրություն տեառն Միխայելի Ասորոյ 1871, Երուսաղեմ, ի տպարանի սրբոց Յակովբեանց, 526+124 էջ:

Մուրադյան Պ. 1977, Հայաստանի վրացերեն արձանագրությունները, Երևանի համալսարանի հրատ., Երևան, 362 էջ:

Յովսէփեան Գ. 1969, Խաղբակեանք կամ Պռոշեանք հայոց պատմության մէջ, տպարան կաթողիկոսութեան հայոց Մեծի տանն Կիլիկիոյ, 523 էջ:

Շահնազարյան Ա. 1990, Վահրամյանների իշխանությունը, Երևան, «Հայաստան» հրատ., 216 էջ:

Շահնազարյան Ա. 2005, Զաքարյանների ազատամարտերի երկրորդ փուլը, Լրաբեր հասարակական գիտությունների, թիվ 3, Երևան, էջ 32–52:

Պատմություն նահանգին Սիսական արարեալ Ստեփաննոսի Օրբելեան արքեպիսկոպոսի Սինեաց 1910, Թիֆլիս, Ելեքթրաշարժ տպ. օր. Ն. Աղանեանցի, 618 էջ:

Հաաքումն պատմութեան Վարդանայ վարդապետի լուսաբանեալ 1862, ի Վենետիկ, ի Սուրբ Ղազար, 184 էջ:

Վիմական տարեգիր 1913, կազմեց Կ. Կոստանեանց, տպարան գիտութեանց ճեմարանի կայսերականի, Ս.-Պետերբուրգ, 292 էջ:

Картлис цховреба 2008, История Грузии, Тбилиси, изд. «Артануджи», 451 с.

Շихаб ад-Дин, Мухаммад ан-Насиви 1973, Жизнеописание султана Джалал ад-Дина Манкбурны, перевод с арабского, предисловие, комментарии, примечания и указатели З.М. Бунятова, изд-во «ЭЛМ», 450 с.

**ИЗ ИСТОРИИ ОТНОШЕНИЙ МЕЖДУ РАЗНЫМИ
ПРЕДСТАВИТЕЛЯМИ И ВЕТВЯМИ РОДА ЗАХАРЯНОВ
(1160–1240-ЫЕ ГОДЫ)**

ШАХНАЗАРЯН А.

Резюме

Ключевые слова: Захаряны, Великий Саргис, Закаре II, Иване I, Авак, Шахиншах I, Вардан Гагеци.

Изучение истории отношений между представителями и ветвями рода Захарянов позволяет составить более целостное представление о внутренней жизни этого известного армянского княжеского рода. Выясняется, что в период главенства Великого Саргиса и Закаре II для отношений между представителями и ветвями этого рода характерны были единомыслие и содействие друг другу. Однако в дальнейшем, когда главенство этого княжеского рода перешло к Иване I, а затем – к его сыну Аваку, эти отношения подверглись существенным изменениям, что во многом было обусловлено соперничеством между ветвями Захарянов – шахиншахов и Авакянов за должность амирспасалара. Немалую роль сыграло и то обстоятельство, что, в противоположность другим ветвям Захарянов, в борьбе за грузинский престол Авакяны стали сторонниками кандидатуры Давида Нарина, а не Улу Давида.

FROM THE HISTORY OF INTERPERSONAL AND INTER-BRANCH RELATIONS OF THE ZAKARIANS (1160–1240)

SHAHNAZARYAN A.

Summary

Keywords: the Zakarid dynasty, Sargis the Great, Zakare II, Ivane I, Avak, Shahnshah I, Vahram Gagetsi.

The study of the history of the relationship between the representatives and branches of the Zakarid dynasty enables us to have a more complete understanding of the inner life of this well-known Armenian princely family. As it turns out, during the period of the leadership of Sarkis the Great and Zakare II, the relationship between the representatives and branches of this dynasty was characterized by unanimity of thought and mutual support. However, later, when the headship of this princely family passed to Ivane I, and then to his son Avak, both the interpersonal and interbranch relationships in this family were subjected to significant changes, and this was largely due to the rivalry for the position of the amirspasalar (the commander of the royal forces), that occurred between the Shahnshah and Avakian branches of the Zakarids. Significant was also the role of the circumstance that, contrary to other branches of the Zakarian family, in the struggle for the Georgian throne, the Avakians eventually became supporters of the candidacy of David Narin, rather than Ulu David.